

爾時般遮旬	今則是世尊	其毒蛇之軀
今是龍施身	時五百玉女	今是五百人
八百諸天子	共志無等倫	菩薩所示現
猶為有所因	欲歎其功德	終無能盡焉
彼龍施菩薩	作師子吼時	無數諸天人
皆發無上真	一切皆歡喜	作禮於佛前

佛說龍施菩薩本起經

佛說八吉祥神呪經

吳月支國優婆塞支謙譯

聞如是一時佛在羅閱祇耆闍崛山中與千二百五十比丘俱菩薩千人皆彌勒等佛告賢者舍利弗及諸比丘皆一心聽佛告賢者舍利弗東方去是一恒沙有佛名安隱囑累滿具足王如來至真無所著最正覺今現在說法其世界名曰滿所願聚去是二恒沙有佛名紺瑠璃具足王如來無所著最正覺今現在說法其世界名曰慈哀光明去是三恒

沙有佛名勸助衆善具足王如來無所著最
正覺今現在說法其世界名曰歡喜快樂去
是四恒沙有佛名曰無憂德具足王如來無
所著最正覺今現在說法其世界名曰一切
樂入去是五恒沙有佛名藥師具足王如來
無所著最正覺今現在說法其世界名曰滿
一切珍寶去是六恒沙有佛名曰蓮華具足
王如來無所著最正覺今現在說法其世界
名曰滿香名聞去是七恒沙有佛名算擇合
會具足王如來無所著最正覺今現在說法

其世界名曰一切解說音聲遠聞去是八恒
沙有佛名解散一切縛具足王如來無所著
最正覺今現在說法其世界名曰一切解脫
佛告賢者舍利弗此諸佛如來無所著過四
道不受最正覺其國土清淨無五濁無愛欲
無意垢若有善男子善女人聞此八佛及國
土名受持奉行諷誦讀誦廣爲他人解說其
義者終不愚癡口之所言無有失誤相好具
足無所缺減無央數年不爲乏少是人終不
墮太山地獄餓鬼畜生中也是人終不望取

羅漢辟支佛道而般泥洹必當速得無上平等之道常遇陀隣尼常行菩薩法得功德無量第一四天王常擁護之不為縣官所拘錄不為盜賊所中傷不為天龍鬼神所觸撓閱又鬼神蠱道鬼神若人若非人皆不能害殺得其便也除其宿命不請之罪若有疾病水火鳥鳴惡夢諸魔所撓恐怖衣毛豎時常當讀是八吉祥神呪經呪之即得除愈是時佛說偈言

若有持是經 八佛國土名 不墮三惡處

疾得無上道	自覺發道意	見佛即開解
中外常歡喜	供養心恭敬	億劫阿僧祇
行惡悉消除	持是八吉祥	速得明解救
供事是經者	千葉華中生	珍寶為其出
色像好無上	人聞是尊經	尊敬信樂者
奉持諷誦讀	清淨無放逸	女人信是經
敬慎無諛諂	棄女為男子	聰明常黠慧
奉持八佛名	出入賊不害	刀兵水火毒
諸邪不能干	愛樂奉是經	諸魔不得便
鬼神諸官屬	無能撓亂者	飛行到諸刹

所在大豐樂 心意正無邪 見佛大歡喜
所生常遇佛 等心奉事之 一切衆惡除
疾得泥洹道 精進無懈怠 去離諸魔著
爲人朴直儒 奉持八佛名 勇猛降衆魔
其力如金剛 端正相好具 一切莫能當
布施無慳貪 巨億萬家生 盜賊及怨家
自然皆消除 疾病縣官事 烏鳴諸惡夢
持是八佛名 呪之即除愈 奉持是經者
彌勒菩薩等 第一四天王 常共擁護之
所願皆可得 踊躍大歡喜 一心信樂者

福德亦如是
爾時諸菩薩颺陀和菩薩羅憐那竭菩薩憍
目兜菩薩那羅達菩薩須深彌菩薩摩訶薩
須薩和菩薩因坻達菩薩和輪調菩薩是八
人求道已來無央數劫於今未取佛願言使
十方天下人民皆得佛道若有急疾皆當呼
我八人名字即得解脫壽命欲終時我八人
便當飛往迎逆之諸菩薩彌勒等第一四天
王皆白佛言吾當擁護持八吉祥神呪經者
與我并力令諸疾病皆得除愈佛說經已舍

利弗彌勒菩薩及諸比丘天龍鬼神阿須倫
王皆大歡喜樂聞

佛說八吉祥神呪經

佛說八陽神呪經

西晉三藏竺法護譯

聞如是一時佛在王舍城靈鷲山中時與大
比丘衆千二百五十人菩薩千人俱皆如彌
勒菩薩等佛告舍利弗東方去是過一恒沙

有佛刹佛號快樂如來無所著等正覺今現
在說法國土名不可勝舍利弗東方去是過
二恒沙有佛刹佛號月英幢王如來無所著
等正覺今現在說法國土名歡樂舍利弗東
方去是過三恒沙有佛刹佛號等徧明如來
無所著等正覺今現在說法國土名喜愛舍
利弗東方去是過四恒沙有佛刹佛號分別
過出清淨如來無所著等正覺今現在說法
國土名內噲舍利弗東方去是過五恒沙有
佛刹佛號等功德明首如來無所著等正覺